

Lipsk – něhdy a džensa

Mnohe lěta hižo wjesela so člonoyo Serbskeho šulskeho towarstwa na jězby po rjanych kónčinach Němskeje. Lětuša dnjowa wuprawa wjedžeše při najrjeńšim nazymskim wjedrje do Lipska. Ze Šmitec wozydłownistwom podachu so pućowacy njedawno hižo rano zahe wot Budyšina přez Bačoń, Chrósćicy a Pančicy po awtodroze do Lipska. Wjace hač 40 člonow a přečelow towarstwa bě so za jězbu přizjewiło.

W zapadnym džělu města podachmy so z dwěmaj čotnikomaj na kołoježbu po 3,3 kilometry dolhim Karla Heinowym kanalu. Po puću nam přewodnik tójšto zajimaweho rozprawješe. Tak zhonichmy, zo měješe prawiznik a přede-wzaćel Karl Heine (1819–1888) wiziju, Lipsk zwjazac po wodowym puću ze sewjernym morjom. Ze zwoprawdženjom ideje kumštnu wódnú dróhu hač k Halšrowskemu kanalej twarić a tak přistup k europskej syći wódných dróhow wutworić, Heine dołho njewahaše. W léce 1856 započachu w Plagwitzu kanal mjez Běłym Halšrowom ze Solawu twarić. Hižo w léce 1864 móžachu přeni wotrězk kanaloweje čary a wotewrjenje přenjeho wulkeho kamjentneho mosta přez kanal

swječić. Ze smjerću Heineho a Druhej swětowej wójny so dalši twar dlješe. Za NDRski čas bě kanal industrije dla pře-wšo zanjerodzeny. To je so mjeztym změniło. Džensa su tam nowe bydlenja nastali a widzeć su saněrowane wile a mosty. Wobdžiwać móžachmy tež něhdyše studijo MDR „Riverboot“, w kotrymž je džensa rejwanska šula zaměstnjena. Podłu kanala su kolesowan-sku šćežku pripravili a džiwje zwěrjata so w krajinje derje čuja.

Po wobjedze podachmy so na wjedze-nje po cyrkwi katolskeje propstowskeje wosady Swjateje Trojicy. Cyrkej bě po léce 1989 najwjetši cyrkwinski nowotwar w nowych zwjazkowych krajach, kotryž w léce 2015 poswječichu. Přewodžerka poda nam zajimawe informacije wo stawiznach a džensnišim žiwjenju propstowskeje wosady. Moderny a swojorazny twar zawostaji mjez nami wšelaki začišć. Na dompuću bě chwile za bjesadu a dobru naladu při spěwanju serbskich spěwow. Nimo toho wobdžělnicy zhonichu, zo powjedze wjedcednjowska jězba klětu w meji wot Augsburga do Füssena po južnej Romantiskej droze.

■ **Monika Delerškowa**



We wobłuku swojeho wulěta do Lipska čotnikowachu člonoyo Serbskeho šulskeho towarstwa na Karla Heinowym kanalu.

Foto: Dorothea Šolčina